

四十二章經

迦葉摩騰共竺法蘭譯



四十二章經

	序 始成正覺	3
	序 傳法度人	3
5	序 懷疑請教	3
	1 出家證果	3
	2 斷欲絕求	4
	3 割愛去貪	4
	4 善惡並明	4
10	5 轉重令輕	4
	6 忍惡無瞋	4
	7 惡還本身	4
	8 塵唾自污	5
	9 返本會道	5
15	10 喜施獲福	5
	11 施飯轉勝	5
	12 舉難勸修	6
	13 問道宿命	6
	14 請問善大	6
20	15 請問力明	6
	16 捨愛得道	6
	17 明來暗謝	6
	18 念等本空	7
	19 假真並觀	7
25	20 推我本空	7

5

10

15

20

21	名聲喪本	7
22	財色招苦	7
23	妻子甚獄	7
24	色欲障道	7
25	欲火燒身	7
26	天魔嬈佛	8
27	無著得道	8
28	意馬莫縱	8
29	正觀敵色	8
30	欲火遠離	8
31	心寂欲除	8
32	我空怖滅	9
33	智明破魔	9
34	處中得道	9
35	垢淨明存	9
36	展轉獲勝	9
37	念戒近道	10
38	生即有滅	10
39	教海無差	10
40	行道在心	10
41	直心出欲	10
42	達世知幻	10

南無本師釋迦牟尼佛

自歸於佛 當願眾生 紹隆佛種 發無上意

自歸於法 當願眾生 深入經藏 智慧如海

自歸於僧 當願眾生 統理大眾 一切無礙

四十二章經

昔漢孝明皇帝夜夢見神人，身體有金色，項有日光，飛在殿前，意中欣然，甚悅之。明日，問群臣：此為何神也？

有通人傅毅曰：臣聞「天竺有得道者，號曰佛，輕舉能飛。」殆將其神也。

於是上悟，即遣使者張騫、羽林中郎將秦景博士弟子王遵等十二人，至大月支國寫取佛經四十二章。在第十四石函中登起立塔寺，於是道法流布，處處修立佛寺。遠人伏化願為臣妾者，不可稱數，國內清寧，含識之類蒙恩受賴，于今不絕也。

序 始成正覺

世尊成道已，作是思惟：「離欲寂靜，是最為勝；住大禪定，降諸魔道。」

序 傳法度人

於鹿野苑中，轉四諦法輪，憍陳如等五人，而證道果。

序 懷疑請教

復有比丘，所說諸疑，陳佛進止，世尊教詔，一一開悟，合掌敬諾，而順尊勅。

1 出家證果

佛言：辭親出家，識心達本，解無為法，名曰沙門。

常行二百五十戒，進止清淨，為四真道行，成阿羅漢。

阿羅漢者，能飛行變化，曠劫壽命，住動天地；

次為阿那含，阿那含者，壽終魂靈上十九天，證阿羅漢；

次為斯陀含，斯陀含者，一上一還，即得阿羅漢；

次為須陀洹，須陀洹者，七死七生，便證阿羅漢。

愛欲斷者，如四肢斷，不復用之。

2 斷欲絕求

佛言：出家沙門者，斷欲去愛，識自心源，達佛深理，悟無為法。

內無所得，外無所求，心不繫道，亦不結業。

無念無作，非修非證，不歷諸位，而自崇最，名之為道。

3 割愛去貪

佛言：剃除鬚髮，而為沙門。受道法者，去世資財，乞求取足。

日中一食，樹下一宿，慎勿再矣！使人愚弊者，愛與欲也。

4 善惡並明

佛言：眾生以十事為善，亦以十事為惡。何等為十？身三、口四、意三。

身三者：殺、盜、淫；

口四者：兩舌、惡罵、妄言、綺語；

意三者：嫉、恚、癡。

如是十事，不順聖道，名十惡行。是惡若止，名十善行耳。

5 轉重令輕

佛言：人有眾過，而不自悔、頓息其心，罪來赴身，猶水歸海，自成深廣。

若人有過，自解知非，改惡行善，罪自消滅。如病得汗，漸有痊損耳。

6 忍惡無瞋

佛言：惡人聞善，故來撓亂者，汝自禁息，當無瞋責。

彼來惡者，而自惡之。

7 惡還本身

佛言：有人聞吾守道，行大仁慈，故致罵佛。

佛默然不答。

罵止。

問曰：子以禮從人，其人不納，禮歸子乎？

曰：歸矣。

佛言：今子罵我，我今不納，子自持禍，歸子身矣！

猶響應聲，影之隨形，終無免離，慎勿為惡。

5 8 塵唾自污

佛言：惡人害賢者，猶仰天而唾，唾不至天，還從己墮。

逆風揚塵，塵不至彼，還坌己身。賢不可毀，禍必滅己。

9 返本會道

佛言：博聞愛道，道必難會。守志奉道，其道甚大。

10 喜施獲福

佛言：覩人施道，助之歡喜，得福甚大。

沙門問曰：此福盡乎？

佛言：譬如一炬之火，數百千人，各以炬來分取，熟食、除冥，此炬如故。福亦如之。

15 11 施飯轉勝

佛言：飯惡人百，不如飯一善人；

飯善人千，不如飯一持五戒者；

飯五戒者萬，不如飯一須陀洹；

飯百萬須陀洹，不如飯一斯陀含；

20 飯千萬斯陀含，不如飯一阿那含；

飯一億阿那含，不如飯一阿羅漢；

飯十億阿羅漢，不如飯一辟支佛；

飯百億辟支佛，不如飯一三世諸佛；

飯千億三世諸佛，不如飯一無念無住無修無證之者。

12 舉難勸修

佛言：人有二十難：

貧窮布施難 豪貴學道難 棄命必死難 得覩佛經難 生值佛世難、
忍色忍欲難 見好不求難 被辱不瞋難 有勢不臨難 觸事無心難、
廣學博究難 除滅我慢難 不輕未學難 心行平等難 不說是非難、
會善知識難、見性學道難 隨化度人難 覩境不動難 善解方便難。

13 問道宿命

沙門問佛：以何因緣得知宿命，會其至道？

佛言：淨心守志，可會至道。譬如磨鏡，垢去明存。斷欲無求，當得宿命。

14 請問善大

沙門問佛：何者為善？何者最大？

佛言：行道守真者善，志與道合者大。

15 請問力明

沙門問佛：何者多力？何者最明？

佛言：忍辱多力，不懷惡故。兼加安健，忍者無惡，必為人尊。

心垢滅盡，淨無瑕穢，是為最明。未有天地，逮於今日，十方所有，無有不見，無有不知，無有不聞，得一切智，可謂明矣。

16 捨愛得道

佛言：人懷愛欲，不見道者。

譬如澄水，致手攬之，眾人共臨，無有覩其影者。

人以愛欲交錯，心中濁興，故不見道。

汝等沙門！當捨愛欲。愛欲垢盡，道可見矣。

17 明來暗謝

佛言：夫見道者，譬如持炬，入冥室中，其冥即滅，而明獨存。

學道見諦，無明即滅，而明常存矣。

18 念等本空

佛言：吾法，念無念念，行無行行，言無言言，修無修修。

會者近爾，迷者遠乎！言語道斷，非物所拘。差之毫釐，失之須臾。

19 假真並觀

佛言：觀天地，念非常；觀世界，念非常；觀靈覺，即菩提。

如是知識，得道疾矣。

20 推我本空

佛言：當念身中四大，各自有名，都無我者。我既都無，其如幻耳。

21 名聲喪本

佛言：人隨情欲，求於聲名，聲名顯著，身已故矣。

貪世常名，而不學道，枉功勞形。

譬如燒香，雖人聞香，香之燼矣。危身之火，而在其後。

22 財色招苦

佛言：財色於人，人之不捨。

譬如刀刃有蜜，不足一餐之美。小兒舐之，則有割舌之患。

23 妻子甚獄

佛言：人繫於妻子舍宅，甚於牢獄。牢獄有散釋之期，妻子無遠離之念。

情愛於色，豈憚驅馳。雖有虎口之患，心存甘伏。

投泥自溺，故曰凡夫。透得此門，出塵羅漢。

24 色欲障道

佛言：愛欲莫甚於色。色之為欲，其大無外。

賴有一矣，若使二同，普天之人，無能為道者矣。

25 欲火燒身

佛言：愛欲之人，猶如執炬，逆風而行，必有燒手之患。

26 天魔嬈佛

天神獻玉女於佛，欲壞佛意。

佛言：革囊眾穢，爾來何為？去！吾不用。

天神愈敬，因問道意。佛為解說，即得須陀洹果。

27 無著得道

佛言：夫為道者，猶木在水，尋流而行，不觸兩岸，不為人取，不為鬼神所遮，不為洄流所住，亦不腐敗，吾保此木，決定入海。

學道之人，不為情欲所惑，不為眾邪所嬈，精進無為，吾保此人必得道矣。

28 意馬莫縱

佛言：慎勿信汝意，汝意不可信。慎勿與色會，色會即禍生。

得阿羅漢已，乃可信汝意。

29 正觀敵色

佛言：慎勿視女色，亦莫共言語。

若與語者，正心思念：我為沙門，處於濁世，當如蓮花，不為泥污。

想其老者如母，長者如姊，少者如妹，稚者如子。

生度脫心，息滅惡念。

30 欲火遠離

佛言：夫為道者，如被乾草，火來須避。道人見欲，必當遠之。

31 心寂欲除

佛言：有人患淫不止，欲自除陰。

佛謂之曰：若斷其陰，不如斷心。

心如功曹，功曹若止，從者都息。邪心不止，斷陰何益。

佛為說偈：

欲生於汝意 意以思想生 二心各寂靜 非色亦非行

佛言：此偈是迦葉佛說。

32 我空怖滅

佛言：人從愛欲生憂，從憂生怖。若離於愛，何憂何怖！

33 智明破魔

佛言：夫為道者，譬如一人與萬人戰，挂鎧出門。

意或怯弱，或半途而退，或格鬥而死，或得勝而還。

沙門學道，應當堅持其心，精進勇銳，不畏前境，破滅眾魔而得道果。

34 處中得道

沙門夜誦迦葉佛遺教經，其聲悲緊，思悔欲退。

佛問之曰：汝昔在家，曾為何業？

對曰：愛彈琴。

佛言：絃緩如何？

對曰：不鳴矣。

絃急如何？

對曰：聲絕矣。

急緩得中如何？

對曰：諸音普矣。

佛言：沙門學道亦然。心若調適，道可得矣。

於道若暴，暴即身疲；其身若疲，意即生惱；意若生惱，行即退矣。其行既退，罪必加矣。但清淨安樂，道不失矣。

35 垢淨明存

佛言：如人鍛鐵，去滓成器，器即精好。

學道之人，去心垢染，行即清淨矣。

36 展轉獲勝

佛言：

人離惡道，得為人難；既得為人，去女即男難；既得為男，六根完具難；

六根既具，生中國難；既生中國，值佛世難；既值佛世，遇道者難；
既得遇道，興信心難；既興信心，發菩提心難；既發菩提心，無修無證難。

37 念戒近道

佛言：佛子！離吾數千里，憶念吾戒，必得道果。

在吾左右，雖常見吾，不順吾戒，終不得道。

38 生即有滅

佛問沙門：人命在幾間？

對曰：數日間。

佛言：子未知道。

復問一沙門：人命在幾間？

對曰：飯食間。

佛言：子未知道。

復問一沙門：人命在幾間？

對曰：呼吸間。

佛言：善哉！子知道矣。

39 教海無差

佛言：學佛道者，佛所言說，皆應信順。譬如食蜜，中邊皆甜，吾經亦爾。

40 行道在心

佛言：沙門行道，無如磨牛。身雖行道，心道不行。心道若行，何用行道？

41 直心出欲

佛言：夫為道者，如牛負重，行深泥中，疲極不敢左右顧視。出離淤泥，乃可蘇息。沙門當觀情欲，甚於淤泥。直心念道，可免苦矣。

42 達世知幻

佛言：

吾視王侯之位，如過隙塵；視金玉之寶，如瓦礫；

視紈素之服，如敝帛； 視大千界，如一訶子；
視阿耨池水，如塗足油； 視方便門，如化寶聚；
視無上乘，如夢金帛； 視佛道，如眼前花；
視禪定，如須彌柱； 視涅槃，如晝夕寤；
5 視倒正，如六龍舞； 視平等，如一真地；
視興化，如四時木；
諸大比丘，聞佛所說，歡喜奉行。

四十二章經

10 無上妙法喜見聞 讀誦修持為他說 智德增長災障除 咸共眾生成佛道



香港新界屯門藍地青山公路18號 <https://www.mfbm.hk>
18 Castle Peak Road, Lam Tei, Tuen Mun, NT, Hong Kong